

Script of Evening Dogri News Bulletin, 05 July. 2026

इवनिंग डोगरी न्यूज़ बुलेटिन

समे .18:15 Hrs

एह आकाशवाणी जम्मू ऐ, संजा खबरें च तुंदा सुआगत, पैहलें
खास-खास खबरें कन्नै में अभिलाषा शर्मा।

<><><><><><>

Headlines

1. उपराज्यपाल मनोज सिन्हा होरें श्री अमरनाथ जी जातरा दे प्रबंधन दा जायजा लैने लेई अज्ज पहलगाम च नुनवन आधार शिविर दा दौरा लाया।
2. जातरा दे पैहले 2 दिनें च 32 जहार शा ते श्रद्धालुएं श्री अमरनाथ जी दी पवित्तर गुफा च भगवान शिव दे हिमलिंग रूप दे दर्शन कीते न।

3. उधमपुर ब्हाई अड्डे दी टर्मिनल ईमारत दे निर्माण लेई टेंडर आली प्रक्रिया शुरू कीती गई, निर्माण कम्म अगस्त च शुरू होने दी मेद।

4. जम्मू-कश्मीर थमां खास किस्मै दी बधिया एरिको चेरी ते Scentrose आलू बखरें दी पैहली खेप संयुक्त अरब अमीरात निर्यात कीती गई।

5. ते जम्मू-कश्मीर च अज्ज केई थाहरें हौली शा दरम्याने दर्जे दी बरखा बरने दे असार दस्से गेदे न।

<><><><><><>

ते हुन खबरें दी तफसील कन्नै विजय बजाज।

<><><><><><>

LG-Nunwan Base Camp

उपराज्यपाल मनोज सिन्हा होरें अज्ज पहलगाम च श्री अमरनाथ जातरा दे नुनवन आधार शिविर दा दौरा लाइयै वरिश्ठ अधिकारिणं दे

कन्नै जातरा प्रबंधन दी समीक्षा कीती। इस मौके उप्पर जातरा कन्नै जुड़े दे बक्ख-बक्ख पैहलुएं पर ब्यौरेवार चर्चा कीती गई जिं'दे च श्रद्धालुएं दी आओआई, सुरक्षा सरबंधी उपास, श्रद्धालुएं दे रौहने-बौहने सरबंधी बंदोबस्त, पंजीकरण दी प्रक्रिया ते साज-समेयान सरबंधी होर दुइयां जरूरतां मुख तौर पर शामिल हिआं। इस मौके पर एलजी होरें अधिकारिएं गी निर्देश दिते जे ओह हर इक श्रद्धालु गी जातरा पंजीकरण दे महत्व बारै जानकार बनाने दे कन्नो-कन्नी सबनै श्रद्धालुएं दी सुरक्षा ते आराम दा पूरा-पूरा ख्याल रक्खन। अपने दौरै दरान श्री सिन्हा होरें श्रद्धालुएं कन्नै गल्लबात बी कीती ते उ'नेंगी जकीन दोआया जे प्रशासन उं'दी जातरा गी सुरक्षित ते बवस्थित बनाने च कोई कसर बाकी नेई छोड़ग। मगरा मीडिया कन्नै गल्लबात करदे होई एलजी मनोज सिन्हा होरें आखेआ

..... बाईट

<><><><><><><>

SANJY-Darshan

इस बरे सलाना श्री अमरनाथ जी दी जातरा दी शानदार शुरुआत होई ऐ ते तीर्थ जातरा दे पैहले दो दिनें च मे 32 जहार 313 श्रद्धालुएं पवित्तर गुफा च अमरनाथें दे हिमलिंग रूप दे दर्शन कीते ते पूजा-अर्चना कीती। आकाशवाणी दे जम्मू संवाददाता नै जानकारी दिती ऐ जे जातरा दे दुए रोज 20 जहार 145 श्रद्धालुएं भगवान शिव दे दर्शन कीते। दुए ध्याड़े आए दे श्रद्धालुएं च 14 जहार 611 मर्द, 4 जहार 480 महिलां, 379 न्यानें, 142 साधू, 35 साध्वियां, 17 ट्रांसजेंडर ते 481 सुरक्षाकर्मी शामिल हे। अमरनाथ जात्रिएं तीर्थ जातरा पूरी करने दे बाद रामबन जिले दे बनिहाल ट्रांजिट प्वाइंट पर अपने तजुर्बे सांझे कीते। उनें आखेआ

.....बाईट.....

<><><><><><>

SDRF-Response Camp

अमरनाथ जातरा करा'रदे श्रद्धालुएं दी सुरक्षा यकीनी करने लेई एस.डी.आर.एफ नै जम्मू-श्रीनगर राश्ट्री जरनैली शिड़कै पर चनैनी दे प्रेम मंदरै कश 24 घंटे सेवां उपलब्ध कराने आला इक आपात प्रतिक्रिया केंप खडेरेआ ऐ। जातरा आले रस्ते पर कुसै बी हादसे, मेडिकल सरबंधी आपात स्थिति जां कोई होर कुदरती आपदा थमां निब्बड़ने आस्ते इस केंप गी कायम कीता गेआ ऐ जेड़ा अज्जै-कल्लै दिएं तकनीकें कन्नै ते जान बचाने आले उपकरणें कन्नै लेस ऐ। जिआं जे बहचा लेई रस्सियां, स्ट्रेचर, फस्ट एड किट्टां, आक्सीजन सपोर्ट सिस्टम बगैरा। इस बारै होर जानकारी दिंदे होई एसडीआरएफ दे अधिकारी नै दस्सेआबाईट.....

<><><><><><>

Udh. Airport

उधमपुर च ब्हाई अड्डे दे निर्माण आहली परियोजना ने इक होर महत्वपूर्ण उपलब्धि हासल करी लैती ऐ। केन्द्री मंत्री डाक्टर जीतेन्द्र सिंह होरें दस्सेआ ऐ जे उधमपुर ब्हाई अड्डे दी टर्मिनल इमारत दे

निर्माण लेई टेंडर आहली प्रक्रिया शुरु करी दिती गई ऐ। इस सरबंधे च सोशल मीडिया पर जानकारी सांझी करदे होई डाक्टर सिंह होरें दस्सेआ जे टर्मिनल इमारत परियोजना लेई तकनीकी बोलियां 10 जुलाई गी शुरु होआ'रदिआं न जिसलै के माली बोलियें दी प्रक्रिया 22 जुलाई 2026 गी शुरु होने दी मेद ऐ। उ'नें इब्बी दस्सेआ जे टर्मिनल इमारत दे निर्माण लेई ठेका अगस्त म्हीने दे दुए हफते जारी होग जेहदे'नै निर्माण कम्म ताई बत्त पदरी होई जाहग।

<><><><><><>

ते हुन बाकि दिएं खबरें कन्नै अभिलाषा शर्मा।

Cherries-Exported

राई-बाई ते डब्बाबंद खाद्य उत्पादें दे निर्यात सरबंधी विकास प्राधिकरण - ए.पी.ई.डी.ए. ने खास किस्मै दी बधिया एरीको चेरियें ते स्केन्ट्रोस आलू-बखारें दे जम्मू-कश्मीर थमां संयुक्त अरब अमीरात लेई पैहले-पैहले निर्यात दी बवस्था कीती ऐ। एह पैहल, जम्मू-कश्मीर दे बागवानी खेतर लेई इक महत्वपूर्ण मील दा पत्थर ऐ। संयुक्त

अरब अमीरात जा'रदी इस पैहली खेप च, पुलवामा ते शोपियां जिलें दे करसानें थमां लैते गेदे 1 मीट्रिक टन बधिया उत्पाद शामिल न। इस खेप गी प्राधिकरण दे चेयरमैन अभिषेक देव होरें वर्चअल ढंगै'नै झंडी दस्सियै अबु धाबी ते दुबई लेई रवाना करोआया। उद्योग ते बपार मंत्रालय ने जंदे रोज इस गैह् दा ऐलान कीता जेहड़ी भारत दे बधिया किस्मै दे फलें लेई बधदी अंतर्राष्ट्री मंग उप्पर बी लोऽ पांटी ऐ।

<><><><><><>

Adv. Announcement

आकाशवाणी जम्मू दे प्रादेशिक समाचार एकांश ने प्हाड़ी भाशा लेई कैजुअल न्यूजरीडर-कम-ट्रान्सलेटर ते स्टेनोग्राफर दे पैनल च शामिल होने लेई जम्मू-कश्मीर दे रौहने आहले 21 शा 50 ब'रें धोड़ी दी उम्मी दे इच्छुक मेदवारें कोला दरखास्तां मंगियां न।

कैजुअल न्यूजरीडर-कम-ट्रान्सलेटर लेई घट्टोघट्ट योग्यता कुसै मान्यता हासल यूनिवर्सिटी थमां ग्रेजुएशन ते प्हाड़ी भाशा दी शैल जानकारी दा होना ऐ। न्यूजरीडर लेई (प्रसारण लेई मुआफक) खरी अवाज दा बी होना जरूरी ऐ।

स्टेनोग्राफर लेई, घट्टोघट्ट तालीमी योग्यता कुसै मान्यता हासल एजुकेशन बोर्ड थमां 12मीं पास होना ते प्हाड़ी भाशा च खरी जानकारी दा होना ऐ। कन्नै गै, कम्प्यूटर पर प्हाड़ी भाशा च टाइपिंग दी स्पीड 25 कोला 40 लफ़ज़ फी मिंट होनी लोड़चदी ऐ।

आवेदन दी हार्ड कॉपी 'हेड ऑफ न्यूज, रीजनल न्यूज यूनिट, आकाशवाणी, पंजतीर्थी जम्मू पिनकोड-180001'दे दफ्तरै च (दस्ती) जमा करोआनी होग। एहदे कन्नै सब्बै जरूरी दस्तावेज ते आवेदन शुल्क बी होना चाहिदा (जेहड़ा वापस नेई होग)। सामान्य श्रेणी दे मेदवारें लेई एह शुल्क 355 रपे ते एस.सी/एस.टी/ओ.बी.सी मेदवारें लेई 265 रपे (18 फीसद जी.एस.टी सने) ऐ।

एह शुल्क प्रसार भारती, आकाशवाणी, जम्मू दे बैंक खाता नंबर 10582387126(एस.बी.आई मेन ब्रांच, हरि मार्केट, जम्मू) च ऑनलाइन जमा कीता जाई सकदा ऐ। आई.एफ.एस.सी कोड: SBIN0000657 ऐ। शुल्क जमा करने दे बाद मिले दे स्क्रीनशॉट दा प्रिंटआउट जां ऑनलाइन पेमेंट/ट्रांजैक्शन आई.डी, आवेदन दे कन्नै जरूर होनी लोड़चदी। आवेदन करने दी खीरी तरीक 19 जुलाई 2026 (ऐतवार) ऐ। मती जानकारी टेलीफोन नंबर 0191-2546658 ते 9697177241 पर लैती जाई सकदी ऐ। तफसीली इश्तेहार ते आवेदन फॉर्म साढ़ी वेबसाइट www.newsonair.gov.in पर होमपेज दे अखीरै च 'Vacancies' आइकन पर उपलब्ध ऐ।

<><><><><><>

Weather

मौसम विभाग ने अगले त्र'उं दिनें दरान जम्मू-कश्मीर दे मते सारे हिस्सें च हौली थमां दरम्याने दर्जे दी बरखा ते गरज-चमक दी

भविष्यवाणी कीती ऐ। इस दरान किश थाहें पर भारी बरखा दे
असार बी दस्से गे न जिस करी मुकामी सतह पर चानचक्क हाड़
औने जां ल्हास-पस्सियां पौने दा खतरा बी पैदा होई सकदा ऐ।
आकाशवाणी दे जम्मू संवाददाता दी रिपोर्ट मूजब, मौसम विभाग ने
इब्बी जानकारी दिती ऐ जे अज्ज मुख करियै चिरें दपैही, सं'झां'लै
ते चिरें रातीं बी केईं थाहें पर इक जां द'उं बारी गरज-चमक दे कन्नै
हौली थमां दरम्याने दर्जे दी बरखा बरी सकदी ऐ। इ'आं गै किश
थाहें पर मौलेधार बरखा जां किश चिरै लेई तेज ते भारी बरखा दे
असार बी हैन। इस बारे होर मती जानकारी कन्नै मौसम विभाग दे
डरैक्टर मुख्तार अहमद

..... बाईट

<><><><><><>

Placement Drive-Udh.

पढ़े-लिखे दे नौजवानें लेई कम्म-रोजगार दे मौकें च बाद्दे दे
मकसद कन्नै उधमपुर दे जिला रोजगार ते परामर्श केन्द्र आसेआ

इक ध्याड़े दे भर्थी अभियान दा आयोजन कीता गेआ। इस कार्यक्रम दी अगुवाई मैहकमे दिएं असिस्टेंट डरैक्टर प्रियंका गुप्ता होरें कीती, जि' नें नौजवानें दा दिल बधाया जे ओह ऐसी पैहलकदमिं दा बद्धोबद्ध लाह ठोआंदे होई अपने भविक्ख गी आकार देन। जिले दे बक्ख-बक्ख हिस्सें थमां आए दे तकरीबन 200 मेदवारें, इस भर्थी अभियान च हिस्सा लैता। इस अभियान दरान खातिर-तवज्जो, बीमा, सौर उर्जा, साज-समेयान ते तकनीकी सेवाएं दे खेतरें कन्नै जुड़ी दिएं 5 कंपनिं, बक्ख-बक्ख औहद्धें पर नौजवानें दी भर्थी कीती। इस सरबंधै च आकाशवाणी समाचार कन्नै चेचे तौर पर गल्लबात करदे होई रोजगार विभाग दिएं असिस्टेंट डरैक्टर प्रियंका गुप्ता होरें आखेआ बाईट

<><><><><><>

News Read By : Abhilasha Sharma and Vijay Bajaj

Composed by : Varinder Sharma

Editor : Kunal Shrivatsa